



Bosna i Hercegovina
Federacija Bosne i Hercegovine
Kanton Sarajevo
Sarajevo, Obala Kulina Bana 9
tel: +387 33 445 138
e-mail: npsa@bih.net.ba
website: www.nps.ba
URED DIREKTORA
Sarajevo, 10.09.2008.godine

RIGOLETTO ZA USPJEŠAN START

Sinoć je, izvođenjem jedne od najpoznatijih Verdijevih opera *Rigoletta*, pod dirigentskim vođstvom Roberta Homena i u režiji Ogniana Draganofa otpočela 87. po redu teatarska sezona Narodnog pozorišta Sarajevo.

Gledatelji su toplo nagradili izvođenje, a posebne ovacije doživjeli su Aida Čorbadžić-Valka, Tvrtko Stipić I nositelj naslovne uloge Armando Puklavec.

Osamdeset sedma sezona Narodnog pozorišta Sarajevo nastavlja se već u subotu koncertom Sarajevske filharmonije, koja će izvesti Bize-Ščedrinovu *Carmen*, pod dirigentskim vođstvom Samre Gulamović, te u nedjelju koncertom Omladinskog simfonijskog orkestra Jugoistočne Evrope, kojim će dirigirati Siniša Marković, dok je za naredni utorak predviđena izvedba operne predstave *Carmen* Bizea, u koncertnom izvođenju, pod dirigentskim vođstvom Tomislava Fačinija.

I Drama Narodnog pozorišta Sarajevo počinje svoju aktivnost jednim značajnim teatarskim gostovanjem.

U ponedjeljak 15.09. popularna i nagrađivana predstava Drame NPS *Ženidba* Nikolaja Vasiljeviča Gogolja, u režiji Petra Večeka, gostovat će u HNK u Osijeku.

Dinamičan početak sezone u Narodnom pozorištu Sarajevo, uz pripreme novih projekata (*Balada o Omeru i Merimi* u Drami; *Traviata* u Operi i *Plavo* u Baletu...) nastavit će se izvedbama baletnih predstava *Of-Of* i *Rahmanjinov*, u koreografiji i režiji Edine Papo i Štrausove *Pepeljuge* u koreografiji i režiji Vasilija Medvedeva; te gostovanjem Međunarodnog festivala suvremenog plesa *Zvrk*, u organizaciji Tanzelarije, Goethe-Instituta BiH, Francuskog kulturnog instituta i Narodnog pozorišta Sarajevo.

Zanimljivo je napomenuti da će u pomenutom periodu i Drama NPS uz gostovanje u Osijeku imati izvedbu maloscenske predstave *Ponoćna igra* Dubravka Jelačića Bužimskog u režiji Gradimira Gojera.

Ovaj mjesec u Narodnom pozorištu u Sarajevu neće proći niti bez izložbene djelatnosti, tako da će u foajeima Narodnog pozorišta Sarajevo biti otvorena izložba *Zaustavljeno vrijeme-slike o plesu*.

Najmlađa publika Narodnog pozorišta imaće priliku družiti se sa protagonistima opere za djecu i mlade *Aska i vuk* Asima Horozića i Nijaza Alispahića.

U povodu prvog mjeseca 87. teatarske sezone direktor Narodnog pozorišta Gradimir Gojer dao je izjavu za medije: „... Pravo je zadovoljstvo da i prije prve premijere u ovoj sezoni pozornica centralne teatarske kuće u Bosni Hercegovini bude poprištem, prije svega europske muzičke tradicije, a potom plesne suvremenosti i naše dramske aktualnosti.

Sigurno je da će 87. teatarska sezona naše kuće ponuditi izuzetno zanimljiv program. Suradnjom sa Tanzelarijom, Goethe-Instituta BiH, Francuskim kulturnim institutom i skupinom strasnika suvremenog plesa i baleta, okupljenim oko Međunarodnog festivala suvremenog plesa *Zvrk* proširujemo mogućnost našim gledateljima da pogledaju neke od najheretičnijih načina promišljanja teatra tjelesnosti u regionu, ali i šire, obzirom da ćemo imati prigodu vidjeti i koreografije ugledne Susanne Linke...”

U ovom periodu predviđene su i druge manifestacije, kao i promotivna djelatnost, kad je u pitanju književna produkcija, u foajeima i na maloj sceni En Face Narodnog pozorišta Sarajevo.

PRESS SLUŽBA NARODNOG POZORIŠTA SARAJEVO